

## Art engiadinaisa a San Murezzan

Elena Denoth expuona i'l Bagn da cura a San Murezzan

DA MARTINA FONTANA / ANR

■ **Davo avair expost sias obras in plüs lós in Svizra expuona Elena Denoth uosa eir a San Murezzan. Sia art engiadinaisa as pudaraja contemplar dals 31 schner fin als 25 favrer aint il Bagn da cura.** «Eu m'allegri fich da pudair expuoner meis purtrets a San Murezzan», disch l'artista *Elena Denoth* da Zernez. Ch'ella s'allegra da pudair muossar in quist'ocasiun a la glieud indigena ed a giasts che bella cultura, che bellas cuntradas, chasas e che bellas bes-chas chi detta in Engiadina.

### Engiadinaisa da persvasiun

L'artista Elena Denoth da Zernez pittura daspö 30 ons. Ella es ün artista autodidacta

chi s'occupa fich ferm da la cultura indigena. Chalandamarz, ils costüms engiadinais e la sulvaschina influenzeschan seis purtrets. Las culuors cotschnas dals costüms engiadinais as vezza bod sün mincha purtret. Ella muossa in ün möd fich viv e real sco cha per exaimpel uffants giouvan e giordan il mumaint pro ün bügl, fa quintar a chasas engiadinaisas lur istorgias o metta in purtret cuntradas idillicas, natüra intacta cun sulvaschina sco eir bes-chas chasanas.


Forsa es sia pittura naïva – uschè noman divers quista direcziun d'art – sur da quista veglia üsanza, la veglia brama da l'uman per il pür e per l'oriund e natural ed uschè per quai chi'd es etern. Quist'impreschiun vain lura eir confermada, schi'sa, cha Elena nu va our i'l liber per uschè

dir disegnar giò alch, mo ch'ella disegna e pittura in seis atelier, e quai uschè sco ch'ella vezza il motiv cun seis ögl intern. Uschè as sviluppan seis purtrets caracteristics, unics, s-chets ed originals i'l vaira sen dal pled. Na il stil da la pittura es il decisiv, mobain la genuinità, l'expressiun persunala, las imaginaziuns, las fantasias, ils plachairs, ils pissers, las temmas e las experiencias dad ella.

### Partir il regal d'anniversari cun tuots

In ocasiun da seis 70avel anniversari s'ha Elena Denoth accumulä ün grond giavüsch. «In collavuraziun cun l'Atelier für Lithographie Peter Schleiss' es naschüda mia prüma litografia originala», disch'la cun tschera riantada. «Da far quella litografia in culur nu d'eira simpel», decler'la ed agiundscha riond, «ma che es fingiä simpel sün quist muond?» La litografia originala dad Elena Denoth as poja eir verer in l'exposiziun a San Murezzan. Ultra da quella sun là exposits impustüt purtrets chi sun gnüts realisats durant ils ultims ons, sco eir üna selecziun da quels da la prüma perioda da sias lavurs d'art.

L'exposiziun dad Elena Denoth i'l Bagn da cura a San Murezzan cumainza als 31 schner e düra fin als 25 favrer. La vernissascha ha lö als 4 favrer da las 17.00 fin a las 19.30. L'artista es preschainta als 16 ed als 23 favrer da las 16.00 fin a las 18.00. L'exposiziun es averta da lündeschdi fin venderdi da las 08.00 fin a las 18.00 e la sonda da las 08.00 fin a las 12.00. Ulteriuras infuormaziuns dà la pagina d'internet: [www.engadinerkunst.ch](http://www.engadinerkunst.ch)



Üsanzas e tradiziuns engiadinaisas as vezza sün bod mincha purtret dad Elena Denoth da Zernez.

FOTO M. FONTANA